

四庫全書薈要

• 乾隆御覽本

集部

欽定四庫全書薈要

集部

文憲集卷十



詳校官候補通政經歷郭祚熾

文憲集卷十

明 宋濂 撰

傳 凡三十五章

太白丈人傳

文憲集

子學既成慨然有濟蒼生之心欲尊王道推霸略稽今驗古建太平十二策與河東薛收西遊長安見隋君道經太白山息於灌木之陰有丈人自東來緇袍無表顏色腫噲肩負東芻去文中子僅十步弛擔箕踞而

坐兩手搔爬眼視雲漢若四傍無一人者搔已習指文
中子謂收曰彼鳳頸龜背須垂至腰者為誰收對曰河
汾王夫子也曰其王通耶曰然曰將何之曰夫子憂世
未治以策西見隋君耳夫人大笑不止文中子異之乃
振衣趨前揖而問曰丈人何哂通也豈通未聞先王之
道不足以咸和萬民乎丈人曰不然也豈八埏之大利
害如牛毛有非一士之舌可盡乎丈人曰不然也豈上
天未欲平治天下天下不當見大道之行乎丈人曰不

然也曰三者既非敢問丈人所哂者何事耶丈人曰嘻
何子愚之甚也夫具人之體服人之服食人之粟脫使
稍有知孰不欲堯舜君民哉是有道焉不可苟而就也
文中子曰其道何如丈人曰道有三其上焉者變和坤
乾經緯星辰樞機四時輶轄五行執天之德以牖帝明
以達帝聰然其自任以斯道之重非人君北面而事之
不復輕出出則必為帝者師若堯之君疇舜之務成昭
禹之西王國是已其次焉者以六合為一家以四海為

翰蕃以五嶽為封鎮以元后為父母以臣鄰為伯仲以
蒸庶為赤子煦以深仁財以正義防以峻禮陶以至樂
威以嚴刑式以庶政治天下可運之掌上然亦不輕於
自試必待王者致敬盡誠而後起而佐之否則樂耕漁
以終其身若成湯之伊尹周之太公望是已其下焉者
仿佯局束啖訾栗斯不遠千里銜已求媚君門如天無
路可陟俯伏闕下鳬道神疲閤隸見訶不敢出氣此不
自重惜而徇時射利者之所為若齊王之門操瑟而售

者是已今子之西來也欲為君疇務成昭西王國乎欲
學伊尹太公望乎抑欲同售瑟於齊王之門者乎子須
麋具在寧不知所自處也且子獨不聞之三家之市有
處子焉必待行媒始相知名又必待納采問名納吉納
徵請期親迎而後始成昏不然是奔也雖國人皆知賤
之矣子今負策而干進恐與不待聘而奔者無大相遠
也況隋君天性沉猜不悅詩書廢棄學校殺戮元勛溺
寵廢嫡惟婦言是用惟刻薄毒痛之法是崇是嗜蕭牆

之禍起在旦夕子尚欲行王道乎言暴虐於湯武之世
必見誅談仁義於桀紂之朝必見黜何也時不同也子
如解吾言即請東轅毋西向不然子其行哉文中子曰
丈人之論至矣通何敢不敬承明訓然竊有疑焉願丈
人卒教之也昔孔子大聖也車轍環於諸國棲棲遲遲
如喪家之狗至再逐於魯削迹於衛窮於齊圍於陳蔡
而卒不悔者誠畏天命而悲人窮也今丈人教通以不
仕然則孔子不足法歟丈人曰是何言與是何言與在

孔子則無可無不可下孔子一等則可其所可不可其
不可子自視其孔子耶抑下孔子一等者耶昔魯男子
善學抑下患者蓋以其不可而學其可也子聞子嘗受
書於李育學詩於夏瑛問禮於關子明正樂於霍汲考
易於王仲華而其知顧出魯男子下子竊為子不取也
夫不察時而冒進謂之瞽施之不當其可謂之愚不度
德量力而强行謂之固枉已從人謂之賊淪溺僵回而
弗止謂之淹瞽則不達愚則不周固則不變賊則不正

淹則不振是五垢者子皆躬蹈之宜乎有疑於子子去
子矣子去子矣夫人言畢負芻而行文中子面如死灰
遠望夫人南行不見其背目猶不暫捨薛收進曰夫子
何慕之深耶收聞不合先王不順禮義謂之奸言雖辯
君子不聽彼夫人不過姦言而辯者爾初未聞先王之
道夫子衝冒風露跋涉而至此終不因其說而中返乎
文中子遂行至隋隋君御太極殿文中子以太平十二
策上之隋君下公卿議公卿多不悅文中子退而嘆曰

丈人其至人哉於是賦東征之歌而歸著續經數萬言
君子曰甚哉出處之難也以河汾之賢操經綸之具施
之天下何不可者而丈人方詆其自售斷斷不恕況其
下者乎其哉出處之難也

雜傳九首

有序

婺為浙水東大郡自昔人物多出其中載諸史冊者
既或謬誤而不載者又將湮沒無聞漁竊病之欲分
道學忠義孝友政事文學卓行隱逸貞節八類作先

民傳以示鄉之來學荏苒沉痾竟不能遂志近幸少
瘳因自劉滂而下得九人皆史官之所略者謾敘其
大槩而附以贊辭俾侍史錄實別稿俟他日書成却
隨類以附入焉傳直書名而不諱者蓋史法當爾也
南山樵者宋濂自引

劉滂傳

劉滂字德霖武義人滂自少誦說能屈其師與浦江梅
執禮同游學人士多傾下之號東梅西劉中大觀己丑

進士第調新昌縣令縣在豫章山中俗嗜鬪令到官輒
移病去以他吏攝之滂臨以誠未幾稱治雖傍邑訟不
能決者乞從滂決之豪鄒氏橫里中挾貴媚誣人死滂
捕致械治之部使者為請不聽卒傳以法投豪于相州
蔡京與滂祖為布衣交滂至京師京曰吾故人有孫耶
除詳定敕令所刪定官欲挽滂為黨會常璩書詩屏間
京疑其訕已屬滂求其迹且遷官滂笑曰此胡為及我
哉京聞之不悅滂亦拂衣去坐是不調者十餘年靖康

初詔除太常博士不拜建炎中上問人才於近臣學士

詹入給事中汪藻舍人李公彥皆云滂可用用滂知建昌軍建昌舊守多懦夫威權不立兵習悍驕邀求無度滂至一以法繩之兵不勝其忿持戟入市掠人物即拒者刺傷之滂捕係追償兵遂為變滂及母妻皆死時紹興甲寅七月三日也滂卒時年五十六其妻湯氏侍姑側兵及身猶不去竟遇害建昌人聞滂死皆慟哭失聲踰期父老猶會佛祠哭之有欲絕者且千里以書弔其

孤朝廷既誅始亂者復用御史言褒滂為朝請大夫官
其一子墉滂好學善屬文與人交終始如一聞有急傾
財赴之居官嫉惡如仇毅然不可回奪以及於難云

贊曰劉氏初居七閩五代之季有汝明者遷永嘉之
荆溪生四子焉孟與仲隨父居季移三衢幼曰器來
從武義滂之六世祖也荆溪之顯者則太常少卿安
節給事中安上人河南從伊川程頤游所學甚粹人
稱二劉先生武義之顯者世有其人其登進士第則

自滂始而通判楚州嘉成甌寧宰三傑繼之後來者
復接踵而起多以善政聞歲時燕饗軒蓋繽紛青紫
間錯當時以為盛事然君子之論則在彼而不在此
也

鞏豐傳

鞏豐字仲至其家鄆之濱城渡江即所寓上斷為武義
人曾祖燾祖庭芝皆左承議郎庭芝世號山堂先生者
也父瀛鄉貢進士前此科目相傳七世矣豐學敏而早

成自童州時前輩源緒古今音節事之因革總統如注
水千丈之壑迎前隨後宿艾駭服以為積數十年燈火
勤力聚數十家師友講明猶不能到也時新迪義理之
學草茅士震於見聞多矜露忸怩至他文史言論儒之
藝業又昧陋偵倒莫知幅程獨豐抑縱開闔條疏品彙
應變不迫富若素有著之於文無險怪華巧而以理屈
人片辭半牘皆清朗得言外趣尤工為詩多至三千餘
首淳熙辛丑以太學上舍對策高第教授漢陽軍代還

舊比皆自學入館有不善之者纔授江東提刑司幹辦公事遭母喪免又授浙東會改法本路人不許為監司屬官遷幹辦福建帥司公事以格知臨安縣政尚寬簡吏民信化刑罰哀息會其友為學官豐勸拔滯淹士坐此食宮觀祿久之始提轄左藏庫復以宮觀罷已而又授宮觀而豐死矣嘉定丁丑正月晦日也年七十豐既挾奇才人謂宜居館閣中秘不應徘徊下列日望其升益顛仆不起故聞其死多傷之而龍泉葉適痛之尤深

豐性質易無岸谷然有以自負命雲侶月跨越汗漫浩
乎不可浼暇日輒載一壺獨行田野不問岐路抵暮而
返去家二里有龍門峽登眺徜徉慨然曰此可以止矣
仕雖不顯無幾微見於顏面云子二人積耕皆為儒

贊曰武義之有鞏氏自庭芝始初庭芝登元城劉安
世之門以道學為東平倡弟子受業者恒數百人及
其來遷也以所學化導如東平故武義人士知尚義
理之學亦自庭芝始至豐又從東萊呂祖謙游於是

中原文獻麗澤淵源萃於一門矣嗚呼懿哉

葉秀發傳

葉秀發字茂叔其先由括徙金華為金華人秀發師事
呂祖謙唐仲友極深性理之學以餘力為文輒擢慶元
丙辰進士第弟子慕之從其學者歲至數百人初授福
州長溪簿丁父憂而歸服除轉慶元府學教授秀發嘗
著論語講義發越新意以誨諸弟子且曰聖門授業之
源無過此書然義理無窮倘一切沿襲舊說吾心終無

所得若欲見諸行事是猶假他人之器以為用用之於
已且惴惴焉不以為便況欲假人乎哉時鉅儒樓鑰史
彌鞏婁昉鄭性之楊簡袁燾皆器秀發與之交而於簡
問難尤切每至日昃忘食簡自謂有所啟發得邊詹顧
葉四子為喜葉蓋指秀發也秩滿推陞循從政郎建寧
府政和令丁母憂服闋調安慶府桐城丞金人犯蘄黃
二州桐城為鄰壤萬目睽睽不相保騎兵將迫家人號
泣求避秀發叱之曰此正臣子竭力致身之日雖死何

憾苟先去之如一邑生聚何脩城浚濠日為備禦計會
金人使諜者至秀發擒之亟斬於城門以徇金人計沮
不得近邑賴以完事定制閭忌其功不自己出上其擅
斬非法降迪功郎未幾錄敘改合入官授宣教郎知徽
州休寧縣俄以前事論奪秀發退居餘十年無一毫缺
望意獨憤李誠之之寃上書訟於朝初誠之守蘄蘄陷
一城士卒皆戰死無降者誠之亦望闕再拜拔劍自刎
議者不錄其忠反咎其不能全人故秀發不平而訟之

言辭朗烈聞者降嘆史彌遠當國人有自桐城來者彌
遠以秀發事為問其人歷言撫綏安定之詳且謂某等
得保首領至今皆葉桐城之賜不然已無桐城久矣彌
遠頷之從容問參知政事宣繒其言同彌遠嘆曰幾失
賢矣即日起發擢知真州揚子縣轉奉議郎差監都進
奏院越七日命知高郵軍高郵為淮東繫治時尚繹騷
弗寧秀發上五策一曰防海道二曰審邊城三曰擇武
守四曰練軍實五曰畜財用而以正人心作士氣為之

本言多聽高沙三十六湖水高而田下隄防不固則千里一壑民且無稼秀發建石埭以疏水勢潴洩有恒無乾溢之病其後馬光祖來為守行埭上思秀發功構堂樊梁之隄以祠焉尋轉承議郎疾作上書乞致事特陞朝奉郎已而疾甚力劾去貪墨吏人勸其何自苦如此秀發曰不可吾死後彼必殘吾民以逞同列來問疾整襟對坐惓惓以究心邊事為祝無他言其忠義出於天性至死不變如此紹定庚寅九月卒年七十卒之日唯

遺書籍數篋弊衣一襲至無以為斂當屬續時民夢秀
發擁高牙大纛入獄祠民疑其為神遂肖像而祠其中
云秀發夷險一節臨事唯可以義動不可以勢利刼澤
物之念則若飢渴然居田里日有犯私鑄者縣令趙善
琛欲重其刑而連坐之秀發曰刑一成而不變君子所
盡心焉縱姦固失傷善亦豈為得哉善琛為之止有悍
戾者日嗜鬪富人嫉之欲以嘯聚之名寘於法秀發白
於郡守鄭如剛曰血氣之爭則有之嘯聚則未之聞也

民因得不死秀發卒後累贈朝議大夫學者尊之曰南坡先生所著書有易說周禮說論語講義及詩文行於世子夢澤孫振祖皆出仕能以清白世其家云

贊曰濂嘗讀國學進士王若訥記秀發桐城斬謀事未嘗不流涕而嘆也當金人陷斬士大夫析圭儋爵者或納款賣降之不暇有若秀發者官僅一丞耳則不顧妻子嬰城固守法宜在所褒嘉顧以擅斬而罪之果何道耶譬有丈夫焉居深山中盜欲舞刀劍效

其財先遣游偵以察虛實其隸怒殺偵者大夫乃不
責盜而責隸可乎不可也國之政如此將何以致乎
治耶宋自是而微矣嗚呼自古當季世變白為黑倒
上為下若斯之類甚衆人所不能堪而秀發安之抑
賢矣哉

喻品傳

從弟南強附

喻品字伯經義烏人其從祖良能與兄良倚同入太學
又同登紹興丁丑進士第其季良弼亦太學生晚以特

科補新喻尉皆以文學稱而良能最知名倂蚤從良弼
學繼受經於永康陳亮復由太學諸生登慶元己未進
士第調宣城尉有境外盜狙入尉界內倂登執之歸於
府府帥臣丘密異之乃立所由尉庭下曰盜逃出境尉
不執闌入境他尉乃執邪所由尉震恐開禧丙寅金人
犯淮府檄令尉二人餉軍由歷陽達鍾離鍾離乃敵衝
要法當以重兵護糧護不滿千人令畏縮不敢前倂奮
不顧難諭鄉長老召募足千數即行道經含山有敗兵

回揚言於衆曰我曹潰矣將以糧資敵乎弗去懼殲耳
民愕視亡策將逃侶曰事急矣乃命弓率執大斧而前
曰設遇敵尉必先死職也終不負國汝未必死乃負尉
耶欲去視吾斧民不敢動卒致饋於濠糧有羨衆謂尉
宜得侶悉歸於公府遷慶元府觀察推官丁父憂不赴
調隆興府觀察推官真德秀來為帥素知侶能文見侶
與屬吏迎道左為之改容思論薦之未薦德秀去侶乃
以選人為宜春丞宜春地接贛吉吏珥筆成風民善訟

侶為人怍怍諒直聽必以情民退無後言凡訴臺部者必曰得宜春丞一聽死無憾居久之由承直郎改奉議郎僉書鎮南軍節度判官聽公事改章服尋陞朝奉郎初侶久從諸老游幕中多新進少年議論雅不合侶嘆曰吾髮已種種寧能與翩翩小兒較短長哉遂請祠而歸築室丈人峰下曰蘆隱若將終焉嘉熙丁酉九月年八十四卒子二人宣子武子侶性豪談論今古輒目光如注氣軒軒出鼻忽間人莫能抗尤長於文辭通直郎

杜游嘗稱之曰質而不俚華而不靡憤而不激怨而不
懟不以食膾炙為美澹乎其有味不以刺文繡為工黯
乎其有光其感時念故推物類情抑揚離合必窮其源
以揚其波其不合於律者鮮矣君子以為知言當乾道
淳熙間朱熹呂祖謙陸九淵張栻四君子皆談性命而
闢功利學者各守其師說截然不可犯陳亮倔起其傍
獨以為不然且謂性命之微子貢不得而聞吾夫子之
所罕言後生小子與之談之不置殆多乎哉禹無功何

以成六府乾無利無以具四德如之何其可廢也於是
推尋孔孟之志六經之旨諸子百家分析聚散之故然
後知聖賢經理世故與三才並立而不廢者皆皇帝王
霸之大略明白簡大坦然易行人多疑其說而未信侃
獨出為諸生倡布列綱紀發為詞章扶持而左右之使
亮之門惡聲不入於耳高名出諸老上皆侃之功也已
而亮為世議所扼當路必欲擠之死地凡再下詔獄侃
與同志生極力營解幾陷羅織遂脫亮於萬死一生之

中亮顧侃曰此生死而肉骨也人多義之侃所著有隨見類錄二百卷蘆隱類藁五十卷首論六經之功用云從弟南強

南強字伯強自幼負奇氣父直方以與陳亮類侃從之游時著錄牒者歲數千百人南強周旋其間獨能探深索隱語移日精銳鋒起亮曰喻伯強文墨翰議凜然可畏也慶元乙卯戊午連貢於鄉未幾入太學中監舉月書率占前列上禮部皆不得第嘉定庚辰俛奉南廊對

授邊功部臨安府富陽縣尉轉脩職郎南強創射樓補
闕卒額時其練習春秋則都肄府中徽幟精明行列整
肅復出他縣上縣民譚甲與丘乙閏譚女以瘡死誣丘
驚跌所致挾王丙為左縣以命南強南強召譚與王列
於庭且詰譚曰汝以病死女誣人汝不吐實將坐汝譚
色動顧謂王曰汝嗾我也亟袖案白上言抵譚罪境內
多盜販舳艫尾相銜不絕徽卒與豪猾為市弗可敗南
強一切禁捕雖犯權勢貽怨諾弗懼也寶慶初禮部侍

郎真德秀以言事去廟堂歸京尹跡其所至欲并以為
罪德秀舟過富春江南強亟見且賦詩為餞人皆壯之
轉承直郎處州縉雲丞未上紹定庚寅三月卒年七十
一南強讀書不為口耳學必欲見之實踐每至名義可
喜事擊節慷慨謂戾契可致初當路欲排善類指陳亮
為根煅煉剝骨罪且不測門人畏其威焰噤不敢出聲
南強義形辭色貽書誚責言先生無辜受罪將責恨入
土吾曹為弟子當怒髮衝冠乃影響昧昧是得為士類

邪復走東甌見葉適備陳寃狀適曰子真義士也即秉
燭為作書數通南強又持走越袖見諸臺官誦言無忌
卒直亮之寃南強為人不立崖岸而見義勇為聞朝廷
行一善政輒昂首吐氣或有司苛虐彈指長吁終日不
樂暇時旅肴設醴與賓友握手劇談日至再三不倦為
文善馳騁下筆輒數千言不繩削而自合大篇短章恣
人取去往往不甚愛惜惟梅隱筆談十四卷尚存子二
厚祖楚楚業進士

贊曰自道廢民散師弟子之義缺平居則繆為恭敬
視其影或不敢踐一逢患難輒反目若不相識然甚
者至更名他師使侶與南強見之必將唾去之矣傳
曰民生於三事之如一唯其所在則致死焉其侶南
強之謂乎

樓大年傳

樓大年字元齡義烏竹山里人父伯寬由太學入官授
江陰縣尉轉知無為軍襄安鎮以終大年從鄉先生徐

高游儒實朱熹弟子故大年長於性命之學登嘉定癸未進士第調迪功郎池州青陽縣尉丁內外艱服除監嘉興府袁部鹽場尋知嘉興青龍鎮該慶壽恩循從事郎嚴州遂安縣令差兩浙西路提刑司幹辦公事兩易監行在會子庫同列以侵欺被劾唯大年獨免改宣教郎知隆興府南昌縣為治先教化建利去病若嗜欲然縣民夜行為讎家毆死事覺賂其甥來就辟甥自陳殺民狀甚悉大年疑之亟命丞往驗丞受賕使焚屍以滅

迹大年怒聞於府屬錄事覆實錄事復受賕如丞大年
正色抗辨錄事為引去上之憲臺令觀察推官重讞事
始白民敬之生為立祠遷奉議郎通判吉州提點刑獄
李迪以大年廉慎命錄一道滯囚大年隨重輕而疏裁
之抱成案就迪言咸聽未幾攝郡事江東大姓查氏以
父遺書據幼弟資產幾六十萬第長訴之縣州歷二十
年不解迪曰非清白吏如大年者不足以究此以其事
下大年舉張詠決子壻爭財故事為例命歸其弟人以

為允歲終吏以公帑錢粟羨餘來白曰此公券內物前
官具有例大年斥之以助軍餉及周宗室之難厄者皆
舉手加額而退換承議郎提領戶部搞賞所主管文字
尋陞朝奏郎寶祐甲寅三月卒於官年七十子一人三
畏大年襟度灑落如晴空皎月一塵不染然在官洞察
民隱脫有理未安者必反覆沉思終夜不寐所見一定
屹如砥柱不移雖壓以權貴人之勢弗回也及解印綬
去攀轅卧轍者綿亘十餘里或者以為無愧古循吏云

初理宗降訓廉謹刑二詔大年撫古之可法戒者二百
事疏之號銘心偶錄藏於家

贊曰濂嘗過竹山問大年子孫無恙獲拜其遺像癯
然一儒者爾而其剛烈之氣則常信於萬物之上人
果可以貌取之哉自夫道學不明士喪其所守雖以
魁梧竒偉之夫考其行事脂韋自媚如女婦之留髯
鬚也其視大年何如哉大年受學徐偁與聞濂洛關
閩之學其所養充矣此所以夙然獨異也學之所繫

於人者有如是哉

許子良傳

許子良字肖說東陽人姿稟卓犖幼誦書一覽通大義及壯馳騁經史精文辭尤長於科目之學抽關啟鑰得言外意生徒欣欣從之旬月間輒知為文肯綮嘉定丙子以詩賦魁江東漕司試禮部不利嘉熙戊戌始登進士第年已五十餘矣調餘姚簿未上用宰相喬行簡薦監鎮江西酒庫前此羸羨率自入子良不納一札以上

歸公家官吏相顧駭嘆淮東轉運司辟主管帳司瀕江
有蘆場三十里所民資其利守邊吏議清野欲悉削去
子良諫之止遷知晉陵縣版籍紛亂官賦多放失諸司
督捕急如雷電吏竄匿殆盡前令以不良去子良為稽
逃亡考隱漏催科定繇條緒粲然沿江制置司辟準備
差遣俄監安溪酒庫改宣教郎知都昌縣庫藏赤立子
良節縮浮冗兩年之間供輸遂有餘豪右設詭名以欺
租賦莫敢何問子良列其主名揭於市復從而一之豪

右慙憤陰圖中子良無隙可乘而止沿江制置司辟幹
辦公事轉承議郎通判和州改江州差幹辦行在諸司
糧料院子良當輪對不欲立異惟取廷臣所言有關天
命人心之大者重陳之不汎不激上為首肯再三未幾
有旨俾閱滯獄八十餘子良為繕案一一讞之雖累歲
不引決者一旦曲直皆白進大學博士請外出知饒州
以臺疏罷主管成都府玉局觀磨勘轉朝奉郎知岳州
復轉朝散郎改知台州弊蠹相仍負上供錢三百餘萬

子良節縮如都昌凡典例所宜得者亦謝去居半載郡計裕如子良聽訟據案與兩造相爾汝以察其情情既得即決遣之吏袖手旁睨具文書而已同僚與吏無所容其私皆忌之吏白每歲以錢折米二萬斛子良又不許而禁卒有不便者於是嗾其毆獄吏以撼之且相與出危言子良知墮其計即委印出關去事上降兩官賈似道開閩荆湖辟主管機宜文字且為辨其非辜敘朝散郎事有難處他人不能寘筆者經子良議定人無異辭

景定庚申三月卒於汧川年七十五子良脩然如鶴風
措孤騫性清介不同俗與人交極尚風義赴急扶顛斧
鉞在前弗暇顧然剛腸嫉惡或面折至發赤世多樂軟
媚見其論議激烈望風嚴憚不知其襟懷夷坦無纖芥
含如意居官務抑豪強凡武斷於鄉者悉刑之事其長
懇懇欲納忠縱嬰其怒不避知都昌日方岳來為郡岳
面目嚴冷人不敢仰視子良數為抗辨且曰侯自我得
之自我失之雖獲罪無恨岳初怒甚已而察子良忠亮

反剡薦之子良生平奉養甚儉雖列膺仕蕭然如寒士
客至啜茗清談飢則煮餅而已子良子四人伯總仲立
最良

贊曰黃夢炎有云子良之為人其平如砥其直如弦
其堅剛如百煉金其孤峭如危壁千仞江萬里亦云
蒼苦勁疑不知四方復有何人文學政事當推子良
為第一吳子良亦云鏡明而衡平子良以之無愧於
清白吏王萬者也子良何以得此於人哉非真卓然

有立合於詩之柔不茹剛不吐者未必能致於斯也
嗚呼賢哉或者以子良從似道辟為白壁蒼蠅之玷
知人之道帝堯亦難之而顧以此尤子良邪其求全
也甚矣

葉由庚傳

葉由庚字成父義烏人伯祖維芑祖維休連擢進士第
父綦字實之以世科累遷太常寺主簿輪對言中書政
本宜清心正已以求賢為務時宰不樂改軍器監丞差

知荆門軍建堡柵開溝洫蒐練民兵人思奮厲會京西
帥幕建議築城東蒙兩山之顛藁以山無水泉且非敵
路條其不便者六制置使趙方主先入之說不從藁嘆
曰敵民誤國寧有避耳遂解印綬去有旨除夔路轉運
判官俄復予祠尋差知武岡軍未上而卒由庚生而口
吃嗜讀書以周大亨習春秋為舉子業試有司不中遂
絕意進取時丹溪徐偁倡明考亭朱熹之學四方人士
多集其門由庚執經從之偁授以中誠仁命性心六字

之說由庚早夜磨礪探窮經旨驗之於躬行期凝合而無間僞謂人曰成父從僞最久靜愿無他好講學意趣殊深吾道為有所托矣遂以通名其齋居且戒之曰心體之流行即天運之流行也無乎不通而塞之人其物矣由庚佩之終身金華何基王栢皆宗於熹學次第相傳遠有端緒皆慕由庚造詣真切相與貽書辨析至無虛月基疑周子太極圖補先天圖之未備其辭多云云由庚則曰太極圖與先天圖實相表裏固不待預見先

天圖而暗與之合先天有圖其辭已具於大傳說卦中亦不待邵子別為論議而後明況先天乃伏羲所圖無非法象自然之妙太極乃周子自出心思擬形畫象而為之者先天圖當作先天圖觀之太極圖當作太極圖觀之圖雖不同而其理則未嘗不一也若曰周子之為圖盡在於修之一言使學者可以用功謂之隨時立教至是益備則可耳切不可謂陰有以補先天圖之未備也先天圖自大極生兩儀加倍而為四八以至於六十

四左自一陽而六陽右自一陰而六陰自然生生不窮
皆是天地本然之妙太極圖止於四象以為火水木金
即其中以為土說至五行輒止各有其義未易優劣正
不必將先天圖比並參較也栢以論語屬詞聯事集為
魯經章句而以大學中庸孟子為之傳已整比成卷質
之由庚由庚則又曰記錄之書非經體也移易固未為
不可第論語乃孔子之微言與他記錄者實殊非可以
緒分類合也南軒張子以程子之意類聚孔孟言仁朱

子猶恐長學者欲速好徑之心滋入耳出口之弊又況孔子之言誠有不可破壞者以今第一卷首條子溫而厲威而不猛恭而安類為夫子出處若入門人記孔子德容之盛未為不可第二卷首條堯曰至公則說乃弟子於終篇特記聖學之傳以著明二十篇之大旨與孟子篇終歷敘道統同一意亦恐不但思古傷今而已也今欲尊四書為魯經唯以孔子格言大訓與問答之語為經門人所自言及子思孟子之書為傳則庶幾爾夫

欲尊之曰經者以其大公至正為萬世常行之道不可
下同諸子並稱不必類合而經始尊也基栢皆深服其
言由庚於講切義理不立異不苟同虛已精索必求真
是之歸雖十往返不厭然其為人端重寡言笑燕居謹
獨盛服不去身暑月則冠雲巾衣素紗深衣終日澄坐
四時之祭豫戒內外祇事具饌必豐潔冥幣必置名封
識如期行事命弟子為儕贊奠獻告廟成徹俎而退則
以餽餘饗宗人若冠若昏喪亦皆遵熹家禮問道考德

者戶外之屨常滿其誨學者曰古之人知行並進聞一
善言見一善行未之能行唯恐有聞若纏蔽於文字間
待其知至而後行是終無可行之日也人以為名言縣
大夫過門問政多以謹義利之辨及視民如傷告之邑
民陰被其賜部使者蔡抗及郡守趙汝騰趙孟傅先後
具書幣請由庚攝麗澤書院山長雖皆力辭而名聞益
顯婦人女子亦如其為修身踐行之士也前至元己卯
閏五月年七十八卒無子以族子遐孫為後平生不務

著書雖研瀛洛諸家之說以教人僅有論語纂遺若干
卷瘦叟自誌一卷藏於家

贊曰發傳朱熹之學而得其真者何基則受經熹之
高第弟子黃榦而黃栢則基之門人也至若徐偁親
承指授於熹而由庚從偁游者最久又盡得其說焉
及偁既沒由庚與基栢遂以道學為東南倡評者謂
基深潛冲澹得學之醇栢通睿絕識得學之明由庚
精詳暢達得學之通考其一時化迪之盛入其室者

殆如春風和氣之襲人從容一言之加輒睟面盎背
而鄙吝為之消盡嗚呼何其盛哉九京可作瀛當為
執鞭焉

吳思齊傳

吳思齊字子善處之麗水人祖深有奇才永康陳亮以
子妻之遂來家永康父遠武學博士官至朝散郎知廣
德軍思齊少穎悟倣邃為古文即可誦季父國子監丞
天澤器之悉授以所學遂用辭章家知名尋由任子入

官監臨安府新城稅鎖廳試漕司中舉上禮部不利後
從常調為嘉興縣丞會令以言去攝縣事縣獄多留繫
思齊坐獄戶讞問凡株連疑罪悉簡出之死刑多平反
事有檢覆得實郡首吏持之上下承望不敢動亟聞部
使者黥之郡有盜殺其黨於貨獄蔓延不決下思齊議
思齊曰盜攘盜貨與民殊科獄久不斷者由吏教囚以
賊累民爾若正其殺人罪置寄賊不問則得矣慮囚者
如其言民有育人之子者恒出入父母家一旦忽不知

所往其父訟求之思齊召父母至庭一訊而情無隱卒
白其事提點刑獄洪起畏辟思齊類曰吏或謂通籍可
立致思齊曰斂怨以干祿非策之上也辭尋監戶部搞
賞酒庫起畏時守鎮江復檄入幕府起畏議築城思齊
諫曰京口以長江為天塹城之何為即城徒厲民耳其
役遂輟賈似道喪母上將以太常鹵簿臨其喪禮部侍
郎文及翁欲上疏言懼禍且中止思齊曰叱嗟而母婢
也公不可默也未幾遷饒州節制司準備差遣監察御

史俞浙以論謝堂出為太府少卿留夢炎當國言堂有
勲籍浙劾之過思齊曰公宅百揆畏勢家而屈臺論天
下其謂何似道丞相堂貴戚力能生殺人思齊以小官
中其諱惡不虞宣泄人為危之而思齊弗顧也俄不願
仕請監南嶽廟流寓桐廬婦翁方登嘗知饒州以思齊
賢每謀以自近思齊不樂依婦勢避去性好施與兄弟
孤女無歸者嫁之比隣兒女欲殺者食之死無以斂手
足者棺之宦游十年田無半畝之增後值宋改物家益

艱虞至無甌石之儲有勸之仕者輒謝曰譬猶處子業
已嫁矣雖凍餓者不能更二夫也中遇寒疾耳失聽交
游苦其聲語未畢馳去獨婺方鳳粵謝翱睦方壽劇談
每至夜指畫手書傍觀咄咄而畧無倦意先墓在麗水
不能數歸省歲時必遙望隕涕因自號全歸誓不失身
以病父母也思齊天性直慤雖行人所難坦然不見崖
異心知有是非不知有毀譽禍福學者尊其行爭師之
方鳳評思齊之為人如徐積陳師道君子不以為過大

德辛丑年六十四手編聖賢順正考終之事曰俟命錄
錄成賦詩別諸友遂卒臨卒神明湛然無怛化意所著
書有左氏傳闕疑擬周公瑾平荊州碑魏司馬孚贊跋
杜詩集陳亮葉適二家文選又倣真德秀文章正宗輯
宋一代詩文卷帙多未就子三人翼之拱之成之拱之
蚤卒

贊曰濂遊浦陽仙華山問思齊舊游處見其石壁題
名尚隱隱可辨故老云思齊與方鳳謝翱無月不游

游輒連日夜或酒酣氣鬱時每扶攜望天末慟哭至
失聲而後返夫以氣節不羣之士相遇於殘山剩水
間奈之何而弗悲若思齊者其知事君不以存亡貳
其心者歟士有哀思齊者云睨碣石其如卷兮鉅海
簸而不移其言信矣哉

謝翱傳

附

謝翱字臯羽福之長溪人後徙建之浦城父鑰性至孝
居母喪哀毀廬墓終身不仕通春秋著春秋衍義左氏

辨證傳於時朝世其學試進士不中落鳧潭泉二州侻有大節會丞相文天祥開府延平長揖軍門署諮事
叅軍聲連梁楚間已復別去及宋亡天祥被執以死翱
悲不能禁隻影行浙水東逢山川池榭雲嵐草木與所
別處及其時號相類則徘徊顧盼失聲哭嚴有子陵臺
孤絕千丈時天涼風急翱挾酒以登設天祥主荒亭隅
再拜跪伏酌畢號而慟者三復再拜起悲思不可遏乃
以竹如意擊石作楚歌招之曰鳧朝往兮何極莫來歸

兮關水黑化為朱鳥兮有味焉食歌闋竹石俱碎聞者
為傷之然其志汗漫超越浩不可禦視世間事無足當
其意者獨嗜佳山水鴈山鼎湖蛟門候濤沃州天姥野
霞碧雞四明金華洞天搜奇挾秘所至即造游錄持以
誇人若載七寶歸者游倦輒憩浦陽江源及睦之白雲
邨尋隱者方鳳吳思齊晝夜吟詩不自休其詩直遡盛
唐而上不作近代語卓卓有風人之餘文尤蘄拔峭勁
雷電恍惚出入風雨中當其執筆時瞑目遐思身與天

地俱忘每語人曰用志不分鬼神將通之其苦索多類
此發睦人士翕然從其學前至元甲午去家武林西湖
上前代遺老尚多存者咸自詫見翱晚明年乙未以肺
疾作而死年四十七瀕死屬其妻劉氏曰吾去鄉千里
交游惟方韶卿吳子善最親不翅兄弟慎收吾文及吾
骨授之韶卿即鳳子善即思齊已而鳳等果至與方幼
學方燾馮桂芳翕登登之第衡瘞翱子陵臺南以文橐
殉伐石表之曰粵謝翱墓初翱以朋友道喪盡吳越無

掛劍者思合同志氏名作許劍錄勒諸石未就復為建
許劍亭於墓右從翱志也翱無子其徒吳貴祠之月泉
書院云翱好修袍獨刻厲憤激直欲起古人從之游不
務譜於流俗意所不顧萬夫莫回也每慕屈平托興遠
游自號晞髮子過談勝國事輒悲鳴煩促涕泗潸然下
士有苟合而氣志得者憎聞翱翱自若也所著手抄詩
八卷雜文二十卷唐補傳一卷南史補帝紀贊一卷楚
詞芳草圖譜一卷宋饒歌鼓吹曲各一卷睦州山水人

物古跡記一卷浦陽先民傳一卷天地間集五卷東坡
夜雨句圖一卷浙東西游錄九卷餘倣秦楚之際月表
作獨行傳及左氏傳續辨歷代詩譜皆未完所選唐韋
柳諸家詩及東都五體詩不在集中

贊曰翱一布衣爾未嘗有一命於朝徒以被天祥之
知麻衣繩屨章皇山澤間若無所容其身使其都重
祿受社稷民人之寄其能死守封疆決矣翱不負天
祥肯負國哉翱蓋天下之士也昔田橫不降漢拔劍

自到客之從死者五百人若翺之志其有類橫之客者非邪吾聞諸任先生云

楊氏家傳

楊端其先太原人仕越之會稽遂為其郡望族後寓家京兆唐末南詔叛陷播州久弗能平僖宗乾符三年下詔募驍勇士將兵討之端夢神人告曰爾亟往此功名機也端與舅氏謝將軍詣長安上疏請行上慰而遣之行次蜀蠻謀知之斂退者半乃詣瀘州合江逕入白錦

軍高遙山據險立砦結土豪與蔣黃三氏為久駐計蠻
出寇端出奇兵擊之大敗尋納款結盟而退唐祚移於
後梁端感憤發疾而卒子孫遂家於播宋贈太師太師
生牧南既嗣世痛父業未成九溪十洞猶未服日夜憂
憤其子部射逆其志選練將卒伐羅閩時閩附南射部
射深入閩匿將士絕其後部射力戰死其子三公抱父
尸不去閩執之以歸牧南卒三公幽於閩半載會阿永
蠻酋長黑長與閩有連語之曰殺其父而囚其子人弗

為也盍歸諸閩不答黑定怒夜以一牝馬竊載與俱歸
且發兵納三公界上三公遣衛兵檄召謝巡檢謝帥夷
獠逆之會濟江夷獠忽懷異志引舟岸北呼謝曰為我
語若主當免我科賦否則吾不以舟濟三公怒瞋目視
舟噓者三舟奔而前三公遂涉夷獠爭持牛醢酒為謝
三公剪帛繫獠頸吸水啜之帛或蛇形獠伏地哀祈誓
輸賦不敢反三公復啜之帛如初三公生二子實實實
當立自以才不逮讓與實實字真卿聞宋太祖受命即

欲遣使者入貢會小火楊反新添族二部作亂實同謝
巡檢討之夜薄賊營盡殲其衆實傷流矢病創而卒實
生昭字子明既嗣世二弟先蟻各擁強兵先據白錦東
遵義軍號下州蟻據白錦南近邑號揚州昭不能制曾
未幾何蟻稱南衙將軍舉兵攻先且外結閩兵為助謝
巡檢子都統謂昭之子貴遷曰蟻召仇讎而賊同氣罪
不容於死盡討之遂大發兵設二覆於高遙山要其歸
而擊之閩大潰赴水死者數千蟻亡入閩貴遷太原人

與端為同族其父充廣乃宋贈太師中書令業之曾孫
莫州刺史充本州防禦使延朗之子嘗持節廣西與昭
通譜昭無子充廣綴貴遷為之後自是守播者皆業之
子孫也貴遷字升叔慶歷皇祐間儂智高亂邕貴遷曰
通夜郎浮牂牁出其不意擊之漢制南粵之奇策也吾
當報國以自效即如瀘次於南川得暴疾將還其季父
先使南川鉅族趙隆要殺之官至武功大夫德州刺史
生三子光震光榮光明光震字長卿瀘南夷羅乞弟叛

瀘遣使乞師光震督兵行時閩黨宋大郎與乞弟通過
其歸道光震與戰連七日不決遣帳卒王龍間道走播
趣謝都統濟師謝至武婆山見二酋縱騎橫槊馳騁若
指麾其衆謝以勁弩射其一應弦而斃其一大憤拔刃
衝陣謝斫傷其首殺之即宋兄弟也二夷懼而退因不
能為瀘患光震官至從義郎沿邊都巡檢使生五子文
廣文真文錫文貴文宣文廣字敬德少孤仲父光榮潛
謀篡立衆弗與光榮奔高州欲藉蠻兵以危宗國文廣

與部將謝石近謝成忠謀奉書幣送光榮以歸事之如
初光榮復欲陰鳩文廣文廣詭為不知愛敬日篤黃標
儀盜發光震墓文廣捕斬之事連其弟理郭理郭奔高
州蠻謀作亂會老鷹砦獠穆族亦叛文廣命謝都統討
夷之斬理郭戮穆獠釋其黨七人初西平徭視諸蠻尤
桀黠難制文廣偕成忠夜入其柵擒獲之尋數其罪貸
焉當文廣之時蠻獠為邊患楊氏先世所不能縻結者
至是叛計服懷無復攜貳封疆闢而戶口增矣年僅三

十六而歿君子惜之官至武節大夫生三子惟聰惟吉
惟信惟聰字晦之七歲而孤育於母舅謝石近家石近
以主少衆貳因奉光榮攝堡事光榮立日久益固位惟
聰既長光榮深忌之寘毒魚中欲加害覺之弗食光榮
復為送婦高州紹興俱將殺於中塗謀洩弗果行光榮
恙籍播州二縣地千七百里往獻於朝詔即其地建白
錦堡加光榮禮賓使光榮還惟聰率部佐出迎光榮豫
置毒於茗以俟隸人誤進光榮啜之即斃惟聰始親政

光榮弟光明懟惟聰暮夜以兵劫之惟聰出禦光明敗
奔蜀訴於部使者李獻誣惟聰謀不軌獻入其辭矯發
南平諸寨兵入播惟聰憤懣不自勝大集兵拒戰敗其
師事聞詔奪獻官進惟聰修武郎左班殿直賜金帶錦
袍慰諭之光明因亡入閩而死居無何惟吉復作亂殺
惟聰二子衆怒共誅之惟聰深懲家難禱於上下神祇
誓曰世世子孫不可以權假人違此言者天實殛之惟
聰復生二子選逡選字簡夫始立值徽欽二帝播遷高

宗南渡選慷慨負翼戴志務農練兵以待徵調士大夫
題之性嗜讀書擇名師授子經聞四方士有賢者輒厚
幣羅致之歲以十百計益士房禹卿來市馬為夷人所
劫轉鬻者至再選購出之遷於客館給食與衣者數載
屬歲大比選厚餽遣徒衛送其還益竟登進士第遂貳
於選謀入閩作亂選邑邑喪明而終官至武經郎生十
有三子唯軫軾最良軫字德輿美髯長身狀貌瓌偉剛
果勇決人服其能嘗病舊堡隘陋樂堡北二十里穆家

川山水之佳徙治之是為湘江軫初無嗣鞠軾子槃為
後晚生三子勲居鼎以槃賢遂不易初議尤愛軾尋授
軾堡政獨築室萬泉以終軫畜一虎馴服左右常駕以
出游人異之官至秉義郎軾字德載沉静寬厚孝友無
間言遇軫諸子不翅若已出初先據下州世治兵相攻
凡七傳至煥軫之幕官猶泳從容白曰骨肉相殘夷狄
之俗也上下揚其初由一人而分干戈日夜相尋孰若
講信修睦復兄弟之親乎軾欣然曰吾有志久矣子為

我往說之泳至下州煥頓顙受命遂盟而還軾留意藝
文蜀士來依者愈衆結廬割田使安食之由是蠻荒子
弟多讀書攻文土俗為之大變軾官至成忠郎累贈武
節郎榮字文卿小字伯強幼授大學即掩卷嘆曰此非
一部行程歷乎必涉歷之至乃可爾長好鼓琴投壺榮
母弟輝有寵於父幾奪其位榮亦欲以位讓之因猶泳
言得不廢開禧二年蜀帥吳曦叛榮帥師赴援會曦誅
不果貢戰馬三百萬白金鉅萬且請因曦誅大舉北伐

以雪先恥上優詔答焉嘉定十二年復輸馬三百於蜀
帥蜀帥以聞上益嘉之南平夷穆永忠盜據公家田桀
曰穆不道犯王略吾為藩臣可緩其死耶帥衆討平之
斬永忠歸其田南平閩酋偉桂弑父自立桀聲罪致討
敗其衆於滇池斬首數千級闢地七百里獲羊牛鎧仗
各以千計煥遠盟鈔掠界上桀遣兵誅之歸煥所掠地
賦於珍州下楊平邊患遂熄桀性孝友安儉素治政寬
簡民便之復大修先廟建學養士作家訓十條曰盡臣

節隆孝道守箕裘保疆土從儉約辨賢佞務平恕公好惡去奢華謹刑罰論者多之楊氏居播十三傳至桀始大官終武翼大夫累贈右武大夫吉州刺史左衛大將軍忠州防禦使賜廟忠烈封威毅侯生三子价佐佑价字善父英偉沉毅自少不羣父沒以郡政畀其子文專志養母端平中北兵犯蜀圍青野原价曰此主憂臣辱時也其可後乎乃移檄蜀閬請自效制置使趙彥訥以聞詔許之馳馬渡劍帥家世自贍之兵五千戍蜀口圍

解价功居多詔授雄威軍都統制未幾復白錦堡為播
州文領郡价統兵如故蜀警又急詔价以雄威軍戍夔
峡价分署所部屯瀘渝間遣奇兵擊東遂以捷多遷武
功大夫閣門宣贊舍人嘉熙初制置使彭大雅鎮渝檄
价赴援价督萬兵屯江南通蜀聲勢北兵不敢犯孟珙
宣撫荆湘余玠制置西蜀皆倚价為重上屢下詔褒美
之价指天誓曰所不盡忠節以報上者有如皦日一日
大飯羣僧价趺坐誦佛書數語而終价好學善屬文先

是設科取士未及播价誦於朝而歲貢士三人云贈開
府儀同三司威武寧武忠正軍節度使賜廟忠顯封威
靈英烈侯文字全斌紹定中北兵始入劍文日閱士卒
為備蜀中避地者多歸之嘉熙中北兵窺江彭大雅復
來徵師价命裨將趙暹帥萬兵赴戰石洞峽擊破之以
功轉武德郎閣門祇候父卒詔起文視事進武功大夫
閣門宣贊舍人文移書余玠曰比年北師如蹈無人之
境者由不能禦敵於門戶故也曷移鎮利閬間經理三

關為久駐謀此上計也今縱未能大舉擇諸路要險建
城濠以為根柢此中計也下則保江自守縱敵去來耳
況西番部落已為北所誘勢必撓雪外以圖雲南由雲
南以并吞蠻部閩邕廣窺沅靖則後門幹腹深可憂也
玠偉其論竟徇中計後果如文言淳祐八年西帥俞興
西征發兵五千人與俱大戰者三皆捷遷左衛大將軍
余玠北伐漢中文命將趙寅會兵渝上三次戰又捷十
二年北兵圍漢嘉文使總管田萬率兵五千間道赴之

夜濟嘉江屯萬山必勝二堡萬以勁弩射之敵不能支
遂却加右武大夫寶祐二年北兵由烏蒙渡馬湖入宣
化宣撫使李魯伯來徵師文遣弟大聲統兵行大小九
戰又捷轉左武大夫五年北兵循雲南將入播文馳奏
詔節度使呂文德偕文入閩諭羣酋內屬大酋勅先領
衆降六年拜親衛大夫以解漁城圍剪烏江寇功加忠
州團練使景定間劉雄飛夏貴守蜀復江安州餉禮義
山戰懸壺平而播兵為多進中亮大夫和州防禦使播

州沿邊安撫使爵播川伯食邑七百戶詔雄威軍加御
前二字以寵異之歲賜鹽帛給邊用著為令文留心文
治建孔子廟以勵國民民從其化卒於咸淳元年贈金
川觀察使元贈榮祿大夫同知樞密院事柱國追封播
國公諡崇德生一子邦憲字仲武倜儻有大節好書史
善騎射始冠授成忠郎雄威軍副都統通管州事二年
閩大舉入寇破沿邊諸戍邦憲出師扼之閩敗却尋潛
渡烏江步騎猝至民大駭邦憲部署諸將令曰必剪此

寇而後朝食蠻聞急引退甫涉江邦憲追擊大敗閩衆
於中江斬首千級擒其酋羅汝歸進武節大夫沿邊安
撫使閩又悉兵寇下邑邦憲復敗之獲酋長阿鮐歷舉
其罪狀而釋之閩自是懼不復出拜利州觀察使遷左
金吾衛上將軍安遠軍承宣使播州節度使至元十二
年宋亡元世祖遣使者詔邦憲內附邦憲捧詔三日哭
奉表以播州珍州南平軍三州之地降十五年入朝詔
襲守如故拜龍虎衛上將軍侍衛親軍都指揮使紹慶

珍州南平等處沿邊宣撫使播州管內安撫使播下邑
黃平壤近於荆地荆之戍將欲奪而因邦憲發其姦請
復歸黃平十八年陞宣慰使十九年閩叛詔發諸道兵
進討師道播而入邦憲給饋餉命將卒與之俱乃夷之
累贈推忠効順功臣銀青光祿大夫平章政事柱國追
封播國公謚惠敏生一子漢英字熙載五齡而孤二十
三年其母貞順夫人田氏挈之朝京師世祖摩其頂熟
視良久諭宰臣曰是兒真國器也宜以父爵錫之賜名

賽因不花授金虎符龍虎衛上將軍紹慶珍州南平等處沿邊宣慰使播州軍民安撫使賜金繒弓矢鞍勒遣歸二十四年族黨構亂殺貞順夫人漢英哀經入奏上詔捕賊至益州戮以徇二十七年詔郡縣上計播之鄰境拒命漢英即括戶口租稅籍進世祖大悅加播州等處管軍萬戶二十八年漢英入朝奏罷順元宣慰司升播州安撫司為宣撫司授漢英軍民宣撫使會羅甸宣慰使幹羅思誘播下邑黃平諸寨酋詐為新闢境土以

獻漢英奏復之幹羅思恚不勝誣言舊有雄威忠勝二
軍思播匿弗奏請籍征交州漢英抗言納土時已隸別
籍矣御史臺審覈上之詔寢其事俄拜漢英侍衛親軍
都指揮使成宗即位漢英入朝者三大德三年詔錫漢
英世守其土漢英奏改南詔驛道分定雲以東地隸播
西隸新部減郡縣冗員去屯丁糧三之一民大便之二
年部蠻桑柘亂湖廣行省議用兵漢英言賊勢方盛宜
招諭之不聽兵出久無功竟以漢英議始相繼降五年

右丞劉深討南詔道出播漢英輦運軍食無乏六年閩
婦蛇節宋隆濟叛詔合湖廣四川二省兵征之命漢英
以民兵從甫出師卒遇賊漢英力戰大軍繼之降阿苴
拔去籠賊復合拒竟大敗縛蛇節斬隆濟阿女而平之
以功進資德大夫賜玉帶金鞍弧矢仁宗立顧禮益厚
進勲上護軍增賜金帛延祐四年黃平南蠻盧彝叛新
部黎魯亦嘯劫聚亂詔漢英宣撫之二賊降置戍而還
漢英為政急教化大治泮宮南北士來歸者衆皆量才

用之喜讀濂洛書為詩文尚體要著明哲要覽九十卷
桃溪內外集六十四卷賜推誠秉義功臣銀青榮祿大
夫平章政事上柱國進封播國公謚忠宣其妻田氏亦
善讀書人以為難能無子以弟播州招討安撫使如祖
之子嘉貞嗣嘉貞至治二年來朝英宗賜名延禮不花
累官資德大夫湖廣行省左丞沿邊宣慰宣撫使嘉貞
卒子資德大夫播州軍民宣撫宣慰都指揮使忠彥嗣
忠彥卒子資德大夫紹慶珍州南平等處沿邊宣慰使

播州軍民安撫使侍衛親軍都指揮使元鼎嗣元鼎卒
無子田氏以始祖季子嘉議大夫湖廣行省叅知政事
播州沿邊溪洞招討使城之子鏗嗣入我國朝鏗遣使
內附授以播州宣慰使實洪武初年云

史官曰播州本秦夜郎且蘭西南隅故地夷獠錯居
時出為中國患楊端藉唐之威靈帥師深入遂據其
土五傳至昭衍子中絕而貴遷以同姓來為之後又
三傳至文廣威靈德懷而羣蠻稽首聽命益有光於

前人又三傳至選留意禮文尊賢下士荒服子弟皆
知向學民風為之一變又二傳至築封疆始大建學
造士立家訓十條以遺子孫其子孫亦繩繩善繼尊
尚伊洛之學言行相顧一如鄒魯之俗昔之爭鬪攷
攘之禍亦幾乎熄矣何其盛歟嗚呼楊氏以一姓相
傳據有土地人民侈然如古之邦君由唐歷五季更
宋涉元幾六百年穹官峻爵珪組照映亦豈偶然之
故哉蓋蒙詩書之澤涵濡惟深頗知忠蓋報君之道

或天有以相之歟楊文公大年所行貴遷之先人誥
辭其中書令業則曰向事僞主當朕親征爰屬危機
能傾丹款其莫州刺史延朗則曰奮身軒陛効命疆
陲均甘苦而得士心衽金革而從王事以此觀之其
功在國家澤被生民可謂厚矣世奕光榮而弗絕者
雖本於天其亦有以也哉其亦有以也哉

劉彬卿傳

劉彬卿名文質彬卿其字也姓劉氏其遠祖仁贍仕南

唐以忠節著子孫居袁者遷於豫章今為豫章人彬卿
讀書不泥章句務在躬行年踰三十擔簦走燕都燕都
貴人一見爭相引重薦為太師國王府儒學正陞教授
皆不赴除承懿寺照磨曾未幾何改繕工司照磨貢新
麵上京彬卿旦夕視惟謹諸司同行者以入雨紅腐絰
於吏議惟彬卿獨否帝與后妃太子皆賜之衣衣凡五
襲人為彬卿榮彬卿曰吾敬君之道當爾也轉詹事院
管勾府正司典簿壽福都總管府經歷中書左丞史克

新戍遼陽時江南餉道絕各屯田以食軍士食且不給
廷議欲徵其米五萬石人難之不敢往彬卿毅然請行
初至軍有欲害之者彬卿色不變疊疊為陳利害衆咸
感動卒致三千四百斛以歸博囉特穆爾以中書平章
統兵鎮西京人畏其威不敢仰視彬卿持官書至左右
索視之弗與遂辭不為通彬卿呼曰朝廷之命將委之
草莽耶索羅聞之竟出見彬卿以官書進索羅視已謂
彬卿曰可與幕府議之彬卿曰官書既達行與否在平

章使臣何與焉趨而退博囉不敢強將宴留之彬卿曰
使事已畢尚何留即日上馬去從事官皆餞之出郊嘆
曰此真使者世蓋不多見也府公俱徵僧賅僧懇御史
臺臺臣問曰何獨無劉經歷邪僧曰經歷乃儒者理苟
直不俟人言不然徒言之無益也且於我無所私焉敢
誣之特授大司農司照磨宣政院聞之欲辟為屬弗能
奪而止時官牛多掠於亂兵貧窶人無所訴富有方者
反指以實口沒去牛羊失其租彬卿舍乘傳偽衣醫者

服徒行民間廉其實以聞徵富人租而優貧窶之家京
南諸倉亡慮數十不以時入糧民告病彬卿馳驛察之
既至紿驛吏曰吾將使江南爾因託故遲留徧詢倉之
前後民盡得其情乃往揖倉使崔甲曰吾使臣爾願預
坐隅以觀美政可乎崔不荅彬卿遂坐與談倉中事崔
忽拂衣起曰君知有使者事爾乃暇及此耶彬卿罵曰
吾農宮也吾不叩汝等誰復叩之汝即具文書來上倉
中人皆吐舌相顧卒治崔如法遠近不待督而事集已

而陞本司都事擢樞密院都事俄復入都水監為丞陞
少監階中順大夫彬卿性耿介不阿行事絕與流俗異
初至燕客塔海平章家平章勸其納少室以奉巾櫛彬
卿曰家有糟糠之妻相期至髮白肯中道棄之乎不聽
其子時敏方幼一少年誘其馳馬竟跌死或語彬卿宜
訟彬卿曰吾兒死生有定命可尤人耶經一晝夜忽自
蘇後十二年補大宗正府譯曹掾一旦以疾卒彬卿召
或者詰之曰此亦墮馬死耶國史掾萬生客死於燕妻

子貧不能歸葬彬卿予錢二千緡俾奉柩還南昌御史大夫多爾濟巴勒有忤相臣出為湖廣行省平章政事省署治武昌道梗未易達必經石頂關歷連雲棧過瞿唐灝灝出萬險而始至從事官皆散去獨彬卿留大夫曰吾國家老臣一死固當彬卿爾家貧爾當從此逝也彬卿曰士窮見節義正在今日大夫何為出此言邪及大夫沒又護其喪還檀州彬卿為人不避事苟使銜命而往雖萬里不辭凡出使即呼官錄其行橐且曰去時苟

增其一即賊也尤善以形色言人吉凶巧發竒中無毫
髮差忒人有意問之輒固閉不答彬卿貌竒古眉毫長
寸許雙目深其瞳閃閃照人黥南先生程文以道人劍
客目之彬卿年七十餘今猶聞其騎青驢出入於豫章
山中云

史官曰嗚呼世道既降平日素號士大夫者恒脂膏
自保秘孰有如彬卿之剛介者乎與人交也勢盛則
趨勢衰則孤鼠竄望其門而畏之孰有如彬卿之不

變其初者乎封殖自私汲汲恐或後視人顛連傾覆
縱有耳若罔聞知孰有如彬卿惠及死喪者乎自它
人言之如彬卿者可謂難矣而彬卿則曰此儒者恒
事耳非難也嗚呼若彬卿者不亦君子之人也哉不
亦君子之人也哉

張中傳

張中字景華臨川人也少習儒以春秋應進士舉不中
遂放情山水歷遊江右諸郡遇異人授以太極數學談

禍福多驗時天下大亂歸隱莫府山與人言避兵之方
從之者吉違則凶歲壬寅春正月上帥師下豫章御史
大夫鄧愈侍上左右因薦中遣使者召至賜之坐問曰
予定豫章兵不血刃市不易肆生民自此蘇息否中對
曰未也旦夕此地當流血廬舍焚燬殆盡鍊柱觀亦化
為灰燼惟一殿歸然存耳夏四月指揮使康泰反一如
中言中自是寵遇有加且言國中大臣將有變上宜預
防秋七月平章邵榮參政趙繼祖伏甲北門欲為亂事

覺伏誅歲癸卯夏五月癸未上祭山川百神於覆舟山
下問中曰此行何如中對曰吉天馬兩重似拜似舞祀
畢上欲還馬忽人立作舞狀已而俯若拜是日中原贄
名馬果符兩重之語中又言省署內當有震驚城中亦
擾擾但於上無傷耳六月丁未忠勤樓災藥砲藏樓中
遇火怒激如雷省署與樓連內外咸恐僞漢陳友諒圍
我豫章三月不解秋七月癸酉上舉兵伐之召問中中
對曰五十日當大勝亥子之日獲其首領其戰必在南

康上因命中從行舟次孤山無風弗能進中曰臣頗習
洞元法當為祭之祭已風大作遂達彭蠡湖己丑戰湖
中之康郎山常忠武王遇春深入虜舟數四圍之其勢
甚危僉以為不可救中曰勿憂也亥時當自出如期果
出連戰輒大勝偽吳王陳友仁及將士溺死者無算八
月壬戌復大戰流屍蔽江陳友諒中飛矢卒癸亥降其
衆五萬自癸酉至癸亥僅五旬唯南康與康郎山小異
爾初豫章受圍上問何日圍解中對曰當在七月丙戌

暨報至乃乙酉蓋日官筭歷是月常差一日實在丙戌
解去其他奇中往往類此中為人狷介寡與人言嘗戴
鍤冠人因號曰鍤冠子云

贊曰濂數與中游見其人類陽狂玩世者與之語稍
涉倫理輒亂以他言竟莫測其故甲辰夏五月同列
二博士有拂上意方杜門待罪中叩二人所生年捉
筆作點點狀如計數者良久笑曰不遠復期在七月
五日濂書而識之至六月之晦有旨令二人復官頗

疑其術之未盡驗及獲見上謝則中所期也中之術亦異哉上嘗親疏十事命漁作傳藏金匱中後六年觀遺橐於故篋因繕錄之而并紀所識之事云

胡長孺傳

胡長孺字汲仲婺州永康人當唐之季其先自天台來徙宋南渡後以進士科發身者十人持節分符先後相望曾祖臬迪功郎欽州司法叅軍脫略豪雋輕貨急施人稱為鄭莊祖巖起嘉定甲戌進士朝奉郎知福州閩

縣事卓行危論奇文瑰句端平嘉定士大夫皆以為不
可及在江西幕府平贛州之難於指顧之頃全活數十
萬人父居仁淳祐丁未進士朝散郎知台州軍州事文
辭政事亦絕出於四方至長孺其學益大振九經諸史
下逮百氏名墨縱橫旁行敷落律令章程無不包羅而
揆序之咸淳十年以任子入官監重慶府隔槽酒務兼
總領湖廣軍馬錢糧所僉廳與高彭李湜梅應春等號
南中八士聲聞赫然會宋亡退隱山林中至元中詔下

求賢有司強起之至京師集賢院薦為翰林修撰言忤
執政改教授揚州秩滿遷建昌適錄事闕官擢長孺攝
之時程楚公家氣燄熏灼即違法人不敢何問其樹外
門侵官道長孺亟命撤之轉台州路寧海縣主簿歲丁
未浙江大侵戊申復無麥民相枕死宣慰同知托歡察爾
議行賑荒之令斂富人錢一百五十萬給之至縣以餘
錢二十五萬屬長孺箴去乃行旁州長孺察其有乾沒
意悉散於民閱月再至索其錢長孺抱成案進曰錢在

是矣托歡察爾怒曰汝膽如山邪何所受命而敢無忌若
此長孺曰民一日不食當有死者誠不及以聞然官書
具在可徵也托歡察爾雖怒不敢問縣有銅巖惡少年徂
伺其間恒出鈔道為過客患官不能禁長孺為衣商人
服令蒼頭負貨以從陰戒騶卒十人躡其後長孺至巖
中人突出要之長孺方遜辭謝騶卒俄集皆成擒俾盡
逮其黨實於法夜行無虞民荷溺器糞田偶觸軍卒衣
卒杖傷民且碎器而去竟不知主名民來訴長孺陽怒

其誣械於市俾左右潛偵之向杖者過焉戟手稱快執
詣所隸杖而償其器羣嫗聚浮屠庵誦佛書為禳祈一
嫗失其衣適長孺出鄉嫗訟之長孺以牟來責羣嫗合
掌中命繞佛誦書如初長孺閉目叩齒作集神狀且曰
吾使神監之矣盜衣者行數周麥當芽一嫗屢開掌視
長孺指縛之還所竊衣長孺白事帥府歸吏言有姦事
屢問弗伏者長孺曰此易易爾夜伏吏案下黎明出姦
者訊之辭愈堅長孺佯謂令長曰頗聞國家有詔盍迎

之叱隸卒縛姦者東西楹空縣而出庭無一人姦者相謂曰事至此死亦勿承行將自解矣語畢吏唯而出姦者驚咸叩頭服罪永嘉民有弟質珠步搖於兄者贖焉兄妻愛之給以亡於盜屢訟不獲且往告長孺長孺曰爾非吾民也去未幾治盜長孺嗾盜誣兄受步搖為贓逮兄赴官力辨數弗置長孺曰爾家信有是何謂誣耶兄倉皇曰有固有之乃弟所質者趣持至驗之呼其弟示曰得非爾家物乎弟曰然遂歸焉轉兩浙都轉運鹽

使司長山場鹽司亟階將仕郎未上以病辭不復仕長
孺為人光明宏偉務為明本心之學慨然以孟子自許
唯恐斯道之失其傳誘引不倦一時學之有如飢渴之
於食飲方嶽大臣與郡二千石聘致庠序數繹經義環
聽者數百人長孺為言人雖最靈與物同產初無二本
皆躍躍然興起至有太息者為辭章有精鬼神金春玉撞
一發其和平之音海內來求者如購拱壁碑板焜煌照
耀四裔鄉闈取士屢司文衡貴實賤華文風為之一變

晚寓武林病喘上氣者頗久一旦具酒食與比鄰別云
將返故鄉門人有識其微意者問曰先生精神不衰何
為遽欲觀化乎長孺曰精神與死生初無相涉也就寢
至夜半喘忽止其子駒排戶視之則正衣冠坐逝矣年
七十五所著書多亡逸唯石塘文彙五十卷行於世其
從兄之綱之純皆以經術文學名之綱字仍仲嘗作薦
書其於聲音字畫之說自言獨造其妙惜其書不傳之
純字穆仲咸淳甲戌進士踐履如古獨行者文尤明潔

可誦人號之為三胡云

贊曰長孺之學出於國子正青田余學古學古師順
齊處士同邑王夢松夢松事龍泉葉文脩公味道味
道則徽國公朱熹之弟子也考其淵源亦有所自哉
初長孺既於學古獲聞伊洛正學及行四方益訪求
其旨始信涵養用敬為最切默存靜觀超然自得晚
年深慕陸九淵為人宇宙即吾心之言諄諄為學者
誦之今其說猶在安得豪傑者興而正其異同哉

王秉彝傳

秉彝名德良和州人姓王氏王氏出江左故望胄也秉
彝為人龐博而堅凝鈎經索史智識過人數級當衆議
膠葛更端猶專前緒秉彝從容墜片言輒憚然從以故
士君子恒歸往之秉彝亦樂與盤旋燕享之禮必極水
陸珍脆酣嬉淋漓不知日之將夕間徜徉奇山水中見
岩姿川容綢繆來獻狀情思炯炯然曰精神聚會吾殆
與之無間豈古人所謂烟霞痼疾也邪勸之仕笑不答

或云是有道者也或云是夫也良其才可用世遜肥蓋
將免乎秉彛比棄弗省自壬辰兵亂秉彛崎嶇戎馬間
雖窘迫甚幸得不死仰天誓曰吾力苟可生人雖百至
凍餒不卹也道遇羣卒縛一男子且行且榜笞之叱曰
不予金當就烹秉彛視之鄉人也輟白金二斤贖之出
京口軍帥有享秉彛者既謁入左廡倒懸一夫頭宰宰
控地作乞命聲秉彛曰欲享賓而虐無辜吾食不下咽
矣帥悟使釋豫章有夫婦避兵者夫死於溺婦苦風孿

不能行秉彝為葬其夫藥婦疾至愈乃遣過廣德逢健
兵反接萌隸以白刃摩其頸老嫗隨之啼秉彝呵曰子
脫可殺獨不哀其母老乎解其接縱去行未及久又遇
一婦腹未睟兒左手引垂髻童童有三兄累累相援泣
游卒荷戈隨其後秉彝呼游卒止出酒飲之且讓曰子
壯士也胡為殺婦人殺一婦人姑寘之奈殺其五子何
曷舍諸游卒如其言及僑居金華一老儒來告曰吾不
火食者信宿矣秉彝為之動容搜困中得米二斛悉予

之建藥區市中畜善藥以賑人急其寔者不受其值由是秉彛樂善之稱聞四方秉彛曰是善名我遂以榜其堂江左海右士咸作為辭章云

史官曰僕嘗游建鄴泛大江過歷陽望八仙人山山雲矗起如車蓋問張文昌舊隱處想在空翠杳靄間故老已盡人無能知者及歸金華與秉彛相見潛溪上衣冠惓然議論磊落有奇氣第流連山水間而志不自釋噫秉彛固歷陽產也豈即所謂隱者邪非邪

吾衍傳

吾衍字子行杭人也意氣簡傲不為公侯屈色常自比郭忠恕居生花坊一小樓客至僮輒止之通姓名使其登乃登廡訪使徐琰一日來見衍從樓上呼曰此樓何敢當貴人登邪願明日謁謝使節琰素重衍笑而去生徒從衍游者常數十百人行坐童子地上使冠者分番下授之時出小青涼傘教之低昂作舞勢或對賓游談大噱解髮濡酒中為戲羣童皆肅容莫敢動衍左目眇

又跛右足一俯一仰嫵媚可觀究有晉宋間風致畜兩
錢如意日持弄之或倚樓吹洞簫數曲超然如忘世者
性好譏侮文學士獨推服仇遠及胡之純長孺兄弟謂
百年間所無有初衍年四十未娶買酒家女為妾至大
三年秋或訟女嘗為已妻官為逮女母母死復逮母後
夫夫主衍家會其偽券事覺連及衍衍固弗知也邏卒
辱衍南出數百步錄事張景亮識之叱曰是不知情何
攝也即遣歸或有訴衍丞相府事下杭府治臘月未盡

二日甲子衍持詩別仇遠竟去不知所之明年三月辛

酉衛天隱以六壬筮之得亥子丑順流象曰是骨朽淵

泥久矣多寶院僧故從衍學為詩聞其死哭甚哀招衍

薨葬之西湖上衍通聲音律呂之學善倣李賀詩工隸

書尤精於小篆其志不止秦唐二李間宛丘趙期頤以

書名世得之行者為多其所著書有尚書要略聽元造

化集九歌譜十二月樂辭譜重正卦氣楚史檮杌晉文

春秋道書援神契說文續解石鼓詛楚文音釋間中編

竹素山房詩世多傳

為說者曰行之才高矣使其能自貶以入繩墨則其所進孰能抗之哉今所學僅若是固可尚也亦可悲也雖然行亦奇士也夫

抱甕子傳

予嘗游括之少微山俯瞰四周如列屏障山之趾有隨地形高下為蔬圃約二十畝凡可茹者咸藝焉傍列桃李梨李諸樹時春氣方殷蔬苗怒長滿望皆翡翠色樹

亦作紅白花繽紛間錯如張錦繡段心頗訝之曰是必有異因曳杖而降冉冉至其處氣象幽夤絕不聞雞犬聲遙望草廬一區隱約出竹陰間疑中有隱者亟前候之良久見一士戴椶葉冠身被紫褐裘抱甕出汲水灌畦予進問曰夫子何名曰山澤之民無所名也強之曰人以其抱甕也遂呼為抱甕子爾曰大丈夫處世亦多術矣出則華軒結駟入則鍾鳴鼎食有志者輒能致之夫子恒營營遂遂於一甕間無乃自苦乎抱甕子忽蹶然

一笑指苔磴揖予坐寘甕於地嘆曰吾受血肉軀與人
同豈不樂榮貴與人異哉顧念之頗熟百歲之間寧復
幾何與其彊情而徇世寧若任真以自放也吾圃之西
則九盤山山之顛宋州解建焉側有烟雨樓當山雲初
興景象萬態極可玩李鄴侯馬莊敏公嘗登之而感慨
矣其東清溪觀秦賢良謫官而來亦游憩其上時坐鷺
花亭賦詩而今竟安在哉非惟人隨流水而逝異日凌
霄之崇構皆蕩為氛埃一凝竚間野草荒烟若愁悲之

不可禁世事往往類此是何足深道吾所以抱甕出入而弗辭也且當抱甕之時嗒然忘形志慮外絕精神內營目不見色耳不聞聲招之弗前麾之不驚委蛇容裔而萬物莫吾敢撓自以無愧於赫胥尊盧之民子以吾為遂遂營營不亦過歟曰然則灌畦亦有道乎曰有蔬性不欲燥燥則生意厄而不伸蔬性宜濕濕或過焉則氣傷而寢屈吾日夜調之變之俾適夫厥中則芄然而秀嫋然而榮矣言訖抱甕而去予深味其言蓋有道而

隱者也所謂強情而徇世曷若任真而自放不幾於樂
其天者歟所謂人物代謝而樓觀不能以存一俯仰間
而感慨係之不幾於達人大觀者歟所謂抱甕有術心
與耳目之官內而弗外不幾於守一不二者歟所謂藝
蔬得中不使倚於一偏不幾於治民有政者歟疾起而
追之抱甕子入竹陰間閉戶高卧扣之不見答若無聞
者予憮然而退

史官曰予既歸金華山日思抱甕子不少置及官南

京見朝紳中貌有相肖者問其同列曰是豈括之灌
畦者邪曰然曰奈何仕為曰去年應聘而起典儀晉
王府轉官起曹剪剔浩穰聲望益龐鬱云曰其氏名
謂何曰此烏傷校官劉浩卿子也名彬其字為宗文
予不覺嘆曰浩卿吾故人也其有賢子若此予不能
知之可愧矣夫雖然宗文當元季政亂肥遯山林若
將終身焉及逢有道之朝輒蹶然興起以力政著聞
其得出處之正者矣向予意其為有道之士者果非

過歟果非過歟使宗文非有道之士則長往山林而
不返矣謂之賢也得乎因記問荅之語為抱甕子傳

王冕傳

王冕者諸暨人七八歲時父命牧牛隴上竊入學舍聽
諸生誦書聽已輒默記暮歸亡其牛或牽牛來責蹊田
父怒撻之已而復如初母曰兒痴如此曷不聽其所為
冕因去依僧寺以居夜潛出坐佛膝上執策映長明燈
讀之琅琅達旦佛像多土偶穉惡可怖冕小兒恬若不

見安陽韓性聞而異之錄為弟子學遂為通儒性卒門
人事冕如事性時冕父已卒即迎母入越城就養久之
母思還故里冕買白牛駕母車自被古冠服隨車後鄉
里小兒競遮道訕笑冕亦笑著作郎李孝光欲薦之為
府史冕罵曰吾有田可畊有書可讀肯朝夕抱案立庭
下備奴使哉每居小樓上客至僮入報命之登乃登部
使者行郡坐馬上求見拒之去去不百武冕倚樓長嘯
使者聞之慚冕屢應進士舉不中歎曰此童子羞為者

吾可溺是哉竟棄去買舟下東吳渡大江入淮楚歷覽
名山川或遇奇才俠客談古豪傑事即呼酒共飲慷慨
悲吟人斥為狂奴北游燕都館秘書卿泰不花家泰不
花薦以館職寃曰公誠愚人哉不滿十年此中狐兔游
矣何以祿仕為即日將南轅會其友武林盧生死灤陽
惟兩幼女一童留燕悵悵無所依寃知之不遠千里走
灤陽取生遺骨且挈二女還生家寃既歸越復大言天
下將亂時海內無事或斥寃為妄寃曰妄人非我誰當

為妄哉乃攜妻孥隱於九里山種豈三畝粟倍之樹梅
花千桃杏居其半芋一區薤韭各百本引水為池種魚
千餘頭結茅廬三間自題為梅花屋嘗倣周禮著書一
卷坐卧自隨秘不使人觀更深人寂輒挑燈朗誦既而
撫卷曰吾未即死持此以遇明主伊呂事業不難致也
當風日佳時操觚賦詩千百不休皆鵬騫海怒讀者毛
髮為聳人至不為賓主禮清談竟日不倦食至輒食都
不必辭謝善畫梅不減楊補之求者肩背相望以繒幅

短長為得米之差人譏之寃曰吾藉是以養口體豈好
為人家作畫師哉未幾汝潁兵起一一如寃言皇帝取
婺州將攻越物色得寃寃幕府授以諮議叅軍一夕以
病死寃狀貌魁偉美鬚髯磊落有大志不得少試以死
君子惜之

史官曰予受學城南時見孟宋言越有狂生當天大
雪赤足上潛嶽峯四顧大呼曰遍天地間皆白玉合
成使人心膽澄澈便欲仙去及入城戴大帽如蓑穿

曳地袍翩翩行兩袂軒翥譁笑溢市中予甚疑其人
訪識者問之即寃也寃真怪民哉馬不更駕不足以
見其奇才寃亦類是夫

鄭景彝傳

鄭銘字景彝婺之浦江人世以孝義顯聞景彝自幼濡
染之深卓然有以自立面目嚴毅不妄言笑人多敬畏
之從父大和司家政察其為人可成遠大器聘鄉先生
吳公萊為之師吳公授以春秋三傳之學發凡舉例會

諸說而折衷之景彝即能領解其趣有所質問咸中肯
綦吳公極鍾愛遂相親如父子金華胡君翰亦來從吳
公遊景彝與之晝夜相摩切凡天地萬物之理內聖外
王之道古今事會之變無不及之講覈既久精神發舒
大肆其力於古文辭吳公品評至嚴一辭稍不脩輒以
為詬病故景彝之文幅尺弘而體式備胡君之文意度
密而波瀾張皆煜煜有光於時云初景彝早喪父事母
黃氏至孝飲食必慎擇以進黃氏嗜鯪魚雖卒不可得

必徧求之以悅其意會有疾益思得魚已而獲魚笔以
香糝上之疾遂瘳奉諸兄如嚴父進退執禮甚恭不命
之坐不敢坐蓮塘張翁無子聞景彝賢而有文命為贅
婿景彝能當翁意翁亦以客禮待之然翁頗木訥自重
景彝亦自韜秘絕不與人交終日嘿嘿而坐或焚香以
銷世慮既而彈指歎曰吾誦詩讀書亦頗有志於事功
奈何鬱鬱久居此耶黃氏歿其志遂孤景彝居喪盡禮
出入必布裹鞍轡三年不御酒肉翁大享賓樂作景彝

潛避去翁不懌或為解曰居喪不聽樂其家法自當爾
翁何怪耶翁自是不敢強翁既耄欲以資產悉屬之景
彝辭請以畀諸族子翁不可姑受其三之一翁之亡皆
景彝葬埋之他受田者漠如也景彝之仲兄鉅歿以次
當長其家哀痛弗忍請至終喪羣從固請乃泣告外姑
以歸籍所得翁之田廬歸於公復自念久居於外不親
家事能荷負者莫如從子渭又宗子也遂為文告先祠
讓之渭亦固辭因虛其席年六十二卒景彝臨事重然

諾不苟於取與鮑溪水惡春漲多溺人景彝架石橋其上潘氏子母老無養給其衣食終身人又稱景彝為惠人云

史官曰濂聞浦陽鄭氏家九葉同居最多令子弟而授經者之師吳公先生又一時名士心極傾下之後十五年濂以非材來繼吳公後始得與景彝交徵諸所聞益信景彝出所作賦數首峻潔莊凝絕似其為人而他文辭亦稱濂方惜景彝之學未暴白於世且

謂王光劍氣終有不可掩者而景彞忽作土中人矣
不亦悲夫濂與景彞暨胡君皆吳公門人胡君既銘
景彞之墓濂亦不能無情遂述為小傳一通以傳嗚
呼有才無命世之如景彞者不少寧不使濂重有所
感乎

樗散生傳

樗散生者錢唐人李氏名詞字孟言少受學越人楊君
維禎負氣尚節善為詩賣藥金陵市中名其室曰樗亭

而自號為樗散生市人病者趨其門買藥無不與所與
必善人人談樗散生美不置口或問樗散生今人莫不
願為材有寸誇尺有尺誇尋惟恐人不知已才不即用
既用又恐不得大任以為戚今生乃以樗散自名樗不
才木也生豈無才者耶何其嗜好與人不同也所惡乎
樗者以其無用也今生脩善藥以活疾疾者有功於民
甚博何為以樗自污哉樗散生曰吾計之熟矣名之美
者吾豈不欲居之然苟無實以稱之則名祇足為禍吾

苟自以為可用彼將以有用者求我我或不足如其所
求則為妄人矣吾今自以為樗彼亦從而樗我不虞我
足用而我足用者固存何損於我乎世之受禍深者求
名太切者也夫名虛器得之未必有益於身而與我競
者齧口恨切斷魚中切然欲奪之不亦危乎吾是以安
焉而不敢務乎名也且吾之食者醫醫之書易知醫之
技易學吾誠盡吾心焉疑於心者不敢強施於人薄於
用者不敢厚責其報雖有不中庶可以無愧矣我誠肯

自負吾才而享金庾之祿豈皆不若乎人然吏胥操法而迫吾側民庶持牒而聒吾前吾心欲平之而力不暇欲施吾才而勢有不能則吾心之愧無時而釋矣豈若守易能之技居無用之名以自適哉於是問者謝之咸稱樗散生為知道者余聞於建安黃仁云

史官曰樗散生之傳不虛矣生豈果知道者哉君子之道貴乎食焉而無愧吾觀世之人有愧者多矣生豈無見者乎孔子強漆雕開仕開自以為未信而不

願為孔子悅之樗散生豈學漆雕開者耶然則謂生為知道豈不然耶或謂生慕樗以不才而壽彼莊生寓言生蓋不取云

李疑傳

金陵之俗以逆旅為利旅至授一室僅可榻俛以出入曉鍾動起浴他事遇夜始歸息盥濯水皆自具然月責錢數千否必詆誚致訟或疾病輒遣出病危氣息尚屬目眊眊未瞑即輿弃之而致其貧婦孕將產者以為不

祥擯不舍其少恩如此非其性固然地在輦轂下四方人至者衆其勢致爾也獨李疑以尚義名於其時疑字思問居通濟門外間巷子第執業造其家得粟以自給不足則以六物推人休咎固貧甚然獨好周人急金華范景淳吏吏部得疾無它子弟人殆之不肯舍杖踵疑門告曰我不幸被疾人莫舍我聞君義甚高能假我一榻乎疑謝許諾延就坐汎除明爽室具床褥爐竈使寢息其中徵醫師視脈躬為煮糜煉藥旦暮執其手問所

苦如事親戚既而疾滋甚不能起溲矢

與屎同

汗浹席臭

穢不可近疑日為刮摩浣滌不少見顏面景淳流涕曰

我累君矣恐不復生無以報厚德囊有黃白金四十餘兩在故逆旅邸願自取之疑曰患難相恤人理宜爾何以報為景淳曰君脫不取我死恐為它人得何益乎疑遂求其里人偕往攜以歸面發囊籍其數而封識之數日景淳竟死疑出私財買棺殯於城南聚寶山舉所封囊寄其里人家往書召其二子及二子至疑同發棺取

囊按籍而還之二子以米饋卻弗受反贐以貨遣歸平陽耿子廉械逮至京師其妻孕將育衆拒門不納妻卧草中以號疑問故歸謂婦曰人孰無緩急安能以室廬自隨哉且人命至重倘育而為風露所感則母子俱死吾寧舍之而受禍何忍死其母子乎俾婦邀以歸產一男子疑命婦事之如疑事景淳踰月始辭去不取其報人用是多疑名士大夫咸喜與疑交見疑者皆曰善士善士疑讀書為文亦可觀嘗以儒舉辭不就然其行最

著云

太史氏曰吾與疑往來識其為人疑姁姁愿士非有
奇偉壯烈之姿也而其所為事乃有古義勇風是豈
可以外貌決人材智哉語曰舉世混濁清士乃見吾
傷流俗之嗜利也傳其事以勸焉

毛德玄傳

毛聚德玄者萊之掖縣人也幼有異質事繼母秦盡孝
里中嘗寇至衆驚走秦老不能行聚獨侍左右弗去寇

問曰爾不畏死耶何為不避我也聚泣曰我老母在安敢自求活乎冠義之不忍犯父嘗病疫居崑崙山中夜渴求酒山深多狼虎聚弗憚跣走出山乞得酒以還父飲而愈與兄弟分財恣其所取而受其弃遺者長兄葬柩將及壙訛言盜且至人懼欲奔匿聚曰兄柩在斯忍弃之以圖生卒掩壙而還再從母殯城隅人取其塋殆盡聚買地瘞之族女六人貧不能嫁聚出私財嫁之族中不克葬者十餘喪聚皆為葬之歲食有餘粟則推以

濟鄰里貸不償者則焚其券有客宿其舍旦遺錢數百
緡而行聚徒步追五十里還之隣人耕侵其畔或以告
聚聚曰寧知非彼地耶其居家待人無長幼皆以誠久
而人咸信之稱為善士聚生二子蔚炳蔚生二子絃綖
皆好學絃今由國子生為殿廷儀禮司序班與余孫慎
同官相友善

史官曰孝弟慈愛人性所發也寧係所習哉萊在東
海上其俗從古號為難治禹書春秋外之今去古二

千載乃有毛君之行是烏可以習俗古今論耶語曰
為善必有後毛君之善卓然可稱矣其子孫殆將有
昌者耶

桑仁卿傳

桑惠字仁卿婺之武義人其先居麗水桑溪南渡後有
景昭者始遷婺歷四世皆不墜書詩仁卿幼喪父獨奉
母居不能與人浮沉介然自守遇人則翼然恭未嘗往
叩富兒門惟日夕訓諸子弟雞初號輒呼起懸燈誦書

食時使從師或值雨淖親持蓋候之還人笑其愚勸曰
子貧若是甌將生塵矣何不學他技藝朝出門暮可即
得錢讀書固佳其効乃如捕風耳仁卿笑曰信如子言
吾家學將絕於吾手矣寧餓而死不能從也乃召其子
以時謂曰此妄人耳其慎毋聽吾之貧由天於讀書何
預哉策勵比前為尤急及見以時明經能文辭鄉校迎
為學者師仁卿撫几自慶曰吾將有以見祖宗地下矣
仁卿無所於食質田於里翁已而失其券乃以計給仁

卿至家使重書之或履其跗曰慎勿言翁券失矣翁券失矣仁卿歎曰吾實得錢言猶在耳而因失券負之爲計固得矣如內媿何一里譁然稱曰桑仁卿其誠慙人哉未幾卒貧不能斂手足鄉人惜其賢哀錢以葬仁卿娶同縣人項寄媛甚賢淑仁卿固安貧終日樵蘇不爨項無纖芥見於容色澹然能相歡凍餒日不自免聞有佳書必掇所織布帛貿之使讀自時厥後以時以賢良徵主表分宜之簿州里攜酒榼來賀曰仁卿夫婦不負

教子今得官歸矣項曰得官不足榮能不負官斯為榮耳以時在分宜數督運萬里外兢兢自持無所遺失再轉為温州判官遣候人迎養將及門而卒今以三轉為夔州府通判陞至某郎益用政事聞於時論者謂父母之善教云

贊曰子弟不患無俊良非父母竭力教之終不能有成也有如仁卿忍貧教子至樵蘇不爨一不變其志澹如也卒能奮發有耀於前人則吾所謂父母不力

教子子未必有成誰不謂然因作小傳以為世勸焉

竹溪逸民傳

竹溪逸民者幼治經長誦百家言造文蔚茂喜馳騁聲聞燁燁起薦紳間意功名可以赤手致忽抵掌於几曰人生百歲能幾旦暮所難遂者適意爾他尚何恤哉乃戴青霞冠披白鹿裘不復與塵事接所居近大溪篁竹脩脩然生當明月高照水光潏潏共月爭清輝逸民輒腰短簫乘小舫蕩漾空明中簫聲挾秋氣為豪直入無

際宛轉若龍鳴深泓絕可聽簫已逸民叩舷歌曰吹玉
簫兮弄明月明月照兮頭成雪頭成雪兮將奈何白鷗
起兮衝素波人見之嘆曰是誠世外人也欲常見且不
可得况狎而近之乎性嗜鞠種之滿園顧視若孩嬰黃
花一開獨引觴對酌日入不倦人讓其留物怒曰舉世
無知我知我惟此花爾一息自怡尚可謂滯於物耶復
愛梅梅孕綠萼微吐赤脚踏雪中若溫見輒凝視移時
目不瞬且大言曰知我者惟鞠鞠已謝我去幸汝梅繼

之汝梅脫入謝去我當上白鶴山采五芝耳白鶴山蓋
溪上諸峰云逸民年五十益恬泊無所繫間私謂其友
曰吾於世味愈孤矣將漁於山樵於水矣其友疑其誕
逸民曰樵於水志豈在新漁於山志豈在魚是無所利
也無所利樂矣子以予果滯於梅與鞠耶君子以其語
近道有類於古隱者相與傳其事逸民所未嘗言則無
從知之矣逸民陳姓洵其名烏傷人

史官曰昔者李白與孔巢父等六人隱居徂徠山世

仰之以為不可狎近因號為竹溪六逸寥寥七百年
後而逸民亦以竹溪自名若出一轍豈聞風而興起
歟縱曰其地或殊人之衆獨有異高風絕塵照映後
先其安有不同者歟士之沉酣聲利而弗返者蓋亦
知所自警歟夫自范蔚宗著後漢書以隱逸登諸史
傳歷代取法而莫之廢者其意又豈無所激歟雖然
逸民之自為則善矣



文憲集卷十

謹案第四十八頁後四行博囉特穆爾舊作孛羅
帖木兒今改後做此 四十九頁前一行博囉
孛作孛羅今改 五十五頁前五行托歡察爾
舊作脫歡察今改後做此



總校官庶吉士臣侍朝

校對官中書臣王鍾泰

謄錄監生臣張士深